

四庫全書

史部

欽定四庫全書

欽定平定臺灣紀畧卷八

二月二十一日紀黃仕簡奏言逆首林興文住居彰屬大里杙地方其糾匪不法多係烏合之衆但此等海外跳梁必足兵力長驅迅掃乃可以破賊膽而壯軍威若輕兵躁進不特未合機宜而小醜且轉滋抗拒臣初到臺郡因內地官兵尚未到齊隨將現到兵丁派撥四郊要路添防加緊堵截保

固府城晝夜嚴督擒捕賊匪嗣官兵續到隨同日
分遣前赴南北二路并力進剿二十四日據赴北
路總兵柴大紀報到克復諸羅縣城池臣業經恭
報在案現在惟有相機調度務期速殲醜類并嚴
擒首逆各要犯解究重治以靖海疆

同日任承恩奏言林興文本係彰屬窩匪肆行不
法現在回踞大里杙一帶窠巢暗通虎仔坑賊目
陳泮吳領等時出滋擾焚掠泉粵村庄臣連日分

派官兵督同鄉勇四路巡防截殺一面謹守內地
各海口密諭番社總通事潘明聰等通知內山生
番頭目懸立重賞令其一體截拿預防遁匿茲聞
水師提臣黃仕簡督令臺灣鎮臣柴大紀克復諸
羅縣城惟斗六門一帶尚為賊踞俟道路通達南
北官兵會合臣協力進攻無難撲滅至臣至愚極
昧罔識事體輕重惟有恪遵

聖訓鎮定持重斷不敢稍涉張皇再本月二十七日接

據都司馬元勳稟報帶領官兵七百名率同鄉勇
前駐埔心庄堵禦賊匪二十六日辰刻賊衆千餘
人由三路下山滋擾都司隨督同官兵分路迎敵
鎗跑并施打倒執旗賊目傷斃賊黨甚多餘賊逃
散等情臣當委親隨妥弁前往確查屬實均奏入
上命軍機大臣傳諭黃仕簡任承恩曰前因黃仕簡任
承恩奏報各摺僅派委將弁等零星打仗並未親臨
行陣業屢經降旨嚴行申飭然尚以黃仕簡或因年

老多病猶存憐憫之念今據伊所奏摺內於現在軍務情形置若罔聞是黃仕簡竟與任承恩互相觀望遷延時日黃仕簡不宜如此朕亦不能因其老病曲為憐宥矣至任承恩摺內有鎮定持重之語伊現在如此退縮不前竟屬怯懦無能豈可藉詞持重乎伊二人於勦捕賊匪種種遲延難辭貽誤之咎又任承恩知斗六門一帶有賊踞守即應督同將弁等親往追捕將賊衆痛加殲戮俾與黃仕簡一路聲息相通

庶賊人聞風落胆首犯得以尅日就擒今伊等如此
遷延觀望幸賊人亦如伊等畏蒞無能不致更肆鴟
張倘賊衆偵知官兵鬆懈復轉相糾聚逞其狡猾致
大軍稍失威重尚復成何事體耶又任承恩奏稱接
據都司馬元勲稟報埔心庄打仗殺斃賊目餘黨逃
散當委親隨妥弁前往確查之處尤屬不成事體任
承恩如果親往該處督勦於該都司稟報虛實何用
更委員弁前往確查豈任承恩竟思安坐彰化觀望

不前乎黃仕簡任承恩著再傳旨嚴行申飭并著該提督等親帶弁兵會同勦捕勿再仍前延緩致干重戾

上又命軍機大臣傳諭常青李侍堯曰本日黃仕簡任承恩六百里報到竟係覆奏諭旨並未帶兵進勦且摺內有鎮重特定之語已降旨將伊二人嚴行申飭矣黃仕簡之摺係正月二十七日拜發距伊二十四日拜發之摺又有三日此三日應與賊打仗何摺內

竟無一字提及若云府城緊要從前崇大紀與永福
二人尚能保護無虞豈此時須添黃仕簡在彼防守
之理前因黃仕簡年老患病朕尚為之原諒今玩悞
至此不惟不覺可原轉覺可惡矣至斗六門為南北
咽喉之地任承恩即應帶兵前往奮勇勦殺以通要
道乃任承恩尚駐劄彰化而黃仕簡又駐劄郡城一
南一北互相觀望以致道路不通此明係彼此退縮
畏怯安得藉詞持重乎從來用兵之道貴乎神速官

兵一到即訂期夾攻使賊無暇抗拒渠魁既得其黨
夥自易殲擒幸而賊匪不過么膺草寇亦如黃仕簡
等之怯懦無能若使稍知謀畧乘隙鳴張一路之兵
稍有失利其餘兵弁雖多自必因而氣餒撲滅為難
尚復成何事體看來此事斷非黃仕簡任承恩二人
所能辦理常青務即速赴臺灣遵照節次諭旨相機
妥辦必須堅持定見親督官兵調度指揮務使壁壘
一新以期一舉集事至黃仕簡任承恩彼此推諉一

味因循其貽誤之咎已無可辭豈可復行寬貸常青
於抵臺灣後嚴切查明如該提督實有逗遛觀望情
事即一面據實嚴叅一面傳旨將伊二人解任令回
內地交李侍堯請旨辦理所有水師提督印務交與
柴大紀暫署陸路提督印務交與郝壯猷暫署候朕
另降諭旨朕於軍務紀律嚴明信賞必罰其有能著
績成功者必格外加恩如阿桂在金川奏凱賞給寶
石帽頂四團龍補服以昭寵異其老師糜餉臨陣失

機者亦無不寘之重典厯厯可數豈黃仕簡任承恩
尚未之知即常青雖擢用總督辦事未久然厯任中
外多年自當知朕用人之道既經朕特交查辦亦不
能為之瞻徇也

同日孫士毅奏言閩省拏獲臺匪楊咏等供出天
地會根源起於廣東和尚洪二房及朱姓人前經
閩浙總督臣常青咨會臣即一面飭拏一面行調
臬司姚茶督緝查辦在案嗣將許阿協等四犯訊

供上年七月十月內有漳州人賴阿恩梁阿步勾
引入會且據供歌訣內有木立斗世字樣匪會係
起於乾隆三十二年及詢以洪朱二犯不能據實
指出臣現查後溪地名粵東饒平潮陽揭陽等處
皆有凡屬後溪地方臣已密飭各該州縣並選派
得力員弁逐處跟查洪朱二犯下落均稱洪姓土
著之人粵東亦到處皆有而身為和尚及稱為洪
二房者各處後溪地方並無其人臣以閩省來咨

後溪之名雖係籠統而鳳花亭三字自屬確鑒現復嚴飭各屬將鳳花亭住址密速跣訪期於必得以便徹底究辦再許阿協賴阿恩林阿俊涂阿番四犯節次訊供余阿番一犯堅供並未入會尚須詳加研鞠此外許阿協等三犯俱係供認入會並能口誦歌詞毫無疑義本應即日委員解京歸案審辦現因嚴查天地會夥犯恐該犯等黨羽尚多所供不實不盡且現在惠來海口又盤獲閩省漳

州人陳孟琴等七名或與該犯等同屬一氣將來
尚有應行質對之處是以暫緩解京奏入報

聞

二十二日

庚申

上命軍機大臣傳諭常青曰總兵柴大紀督率官兵義
勇保護郡城最為出力可嘉郝壯猷在南路一帶督
兵攻剿殺賊多人亦屬認真奮勉自應酌量加恩以
示獎勵著常青查明該鎮等如未經賞過花翎即傳

旨加恩賞戴令其益加奮勵各帶官兵分投剿捕以
期迅速歲事至黃仕簡任承恩並不親臨行陣貽悞
事機已降旨令常青查明即行叅奏解任將水師陸
路提督印務交與柴大紀郝壯猷暫署常青務須飛
渡臺灣遵照節次所降諭旨督率柴大紀等分帶官
兵相機妥辦黃仕簡任承恩並著先即摘去花翎

二十五日
癸亥黃仕簡奏言節次所奉

上諭又奉到

恩賞隨即叩頭祇受臣自病後風症時愈時發現雖心神不足氣力不能如常惟當勉竭駑駘督率官兵奮勇剿滅賊匪以期尅日綏靖海疆奏入

上命軍機大臣傳諭常青李侍堯曰連日盼望臺灣捷報甚為懸切本日黃仕簡有六百里報到朕以為必係奏報剿賊情形及加披閱係接到恩賞及覆奏諭旨於剿捕賊匪之處竟無一字提及而任承恩連日亦無奏報是黃仕簡任承恩互相觀望皆屬一籌莫

展朕前因黃仕簡年老患病一聞賊匪滋事即帶兵
親赴臺灣屢降溫旨獎諭並令加意調攝勿過勞勩
並賞給荷包等物以朕高年如此體恤周至黃仕簡
宜何如感激圖報以慰朕懸切亦應將受恩深重雖
年老病後仍當身先士卒剿滅賊匪以圖報効之處
懇切聲叙即非出於中誠亦當敷衍謝恩乃竟於此
等處所全無一言叙及豈朕眷念老臣而黃仕簡竟
不知仰體高年之主宵旰焦勞之意乎著常青到彼

即將此旨詰問黃仕簡嚴行申飭況總兵普吉保一
到臺灣即率領弁兵親往諸羅一帶會同柴大紀相
機進剿普吉保身係滿洲遇事頗能奮勉黃仕簡在
御前行走非外省提督不曉事者可比乃安然坐視
並普吉保之不若乎且臺灣原設兵丁不為不多乃
黃仕簡等屢次派兵進剿止令郝壯猷徐鼎士等帶
往之兵分投剿捕而於臺灣本地官兵並未將作何
派撥之處奏及現在普吉保已帶延建及水師兵一

千六百名前赴諸羅黃仕簡即應督同親往何以僅委之該鎮黃仕簡竟若置身事外者豈竟因病氣餒觀望不前乎至任承恩年富力强尤非黃仕簡尚可以老病藉口乃駐劄彰化並不帶兵親往賊巢奮勇剿賊竟如溫福在木果木將弁兵各處分散以致賊衆乘間竄發遂至憤事光景此事初起時朕尚不甚介意以爲么庸竊發黃仕簡一到即可捕滅無餘乃不意伊二人竟敢如此遷延觀望殊出意料之外現據

黃仕簡奏到拏獲賊匪蔡紹等訊據供稱賊首林興
文等團聚斗六門勢尚猖獗猶思復攻諸羅而任承
恩柴大紀俱有官兵單薄需撥兵接應之語雖業經
普吉保率領原帶兵一千六百前往協剿但恐賊夥
為數較多黃仕簡任承恩屢派弁兵分投堵禦零星
打仗或一路之兵稍有失利其餘兵弁雖多自必因
而氣餒倘賊匪見黃仕簡等漫無籌畫乘隙鳴張或
有挫失更為可慮常青到臺灣後務須察看情形如

果必須增添兵力即一面具奏一面咨照李侍堯於附近各營再撥二三千名速渡臺灣俾資策應李侍堯接准來咨即行飛調配渡無致遲悞至常青經朕特派前往臺灣督辦剿捕諸務固應親督官兵調渡指揮但伊係總督大臣理宜持重於臨陣打仗時亦應相度事機籌酌輕重此事已專委常青一人辦理當堅持定見勇往前進酌量事宜運籌制勝

臣等謹按賊匪林爽文等圍聚斗六門阻絕南北

道路黃仕簡任承恩果能會齊官兵併力夾攻痛
加剿洗烏合之衆自不難尅日殲除乃彼此遷延
觀望以致賊匪全無忌憚愈肆鴟張我

皇上既屢加申飭明正其罪復飭令添撥弁兵渡臺策
應數千里外之情形燎如指掌斷自

宸衷預為籌備故能迅奏膚功也

二十七日丑孫士毅奏言接奉

諭旨將脩調兵丁撤回歸伍所有業已赴閩之水師兵

一千名因准閩省來札內有交界處所官兵應暫留駐之語是以仍令暫駐黃岡及樟林兩處俟有剿除逆犯的信即行撤回奏入

上命軍機大臣傳諭常青孫士毅曰前因林爽文等不過烏合匪犯聚眾滋事各省遽紛紛徵調辦理過涉張皇恐內地人民聞而生駭是以諭令停止今黃仕簡任承恩二人自到臺灣後並不親帶兵弁迅速追捕一味因循恇怯互相觀望以致賊匪尚未撲滅業

令常青速往臺灣實力督率會剿自無難一鼓殲擒
但恐賊人自知罪在不赦負隅抗守或又有須添兵
力之處是前此粵省已經派調之官兵現今自未便全令撤回
歸伍仍應於交界處所酌量暫為留駐如常青到臺灣後
察看賊匪情形尚須兵力接濟即一面據實具奏一面知照孫
士毅調取應用更為便速此時圖薩布諒已回任孫士毅正
當在潮州一帶往來稽察使臺灣匪犯知有總督在彼督拿不敢
潛行竄入且潮州距閩較近該督親督弁兵就近駐劄更

足以壯聲援而資策應即於搜捕餘匪亦為有益

同日崇大紀奏言正月初四日水師提臣黃仕簡
派調臣統領本標兵丁四百名城守營守備邱能
成兵丁一百三十名臺灣遊擊楊起麟林光玉等
兵丁九百名南澳遊擊李隆兵丁三百名叅將潘
韜兵丁三百名又彰化敗回兵丁二百名共二千
二百三十名前往北剿正在起程之間提臣黃仕
簡飭臣於十六日赴大穆降八甲等處與郝壯猷

會捕賊匪留叅將潘鼐併兵丁三百名守郡城臣
統領官兵一千九百三十名於十七日前往北剿
至灣裡溪等獲賊夥黃余等三名押解提臣黃仕
簡審辦二十一日至外三部竹地方賊匪數千蜂
擁而至臣督率官兵放鎗砲武舉陳宗器諸羅
縣知縣陳良翼笨港縣丞徐英各帶義民助戰鎗
砲打死賊匪甚多生擒偽護駕大將軍廖東一名
紅馬一匹賊徒陳模黃啟等二十一名二十二日

抵田洋賊匪總聚於此約有萬餘人冒死相拒臣
督率官兵極力攻剿自午至酉鎗砲打死賊匪無
數殺死者亦多生擒賊匪林老并番婦留娘等共
八十二名拏獲偽軍師侯辰一名騾馬三匹奪回
砲十一門烏鎗三桿火藥一石鉛子一桶旂刀等
械甚多餘匪四散逃走守備邱能成將城門攻開
我兵即時追趕入城賊匪由北門而逸飭將城內
賊匪迅速搜拏派撥官兵謹守四門惟安平中營

把總郭拔萃兵丁林勇言陣亡臣跟丁林道鄉被
傷餘俱無損隨飭楊起麟等往查各文武衙署軍
裝庫局俱被殘毀倉庫搶劫一空各官印信尚無
下落臣親往街市安民仍舊開店貿易百姓莫不
歡欣鼓舞但擾亂之後亟宜安撫已飛移臺灣道
永福速即委員暫署知縣佐雜等缺以資經理查
附近各庄尚有餘孽俟搜捕淨盡即統兵前往彰
屬巢洗大里杙等處賊巢奏入

上命軍機大臣傳諭常青曰本日柴大紀克復諸羅縣城一摺尚係黃仕簡前日奏報情形所奏已遲至臺灣本設有重兵黃仕簡現帶有本標兵丁未經親臨行陣復將剿賊之叅將潘韜兵丁三百名留駐郡城祇圖自為護衛不意黃仕簡恒怯無能竟至於此現在常青自己前抵臺灣著將柴大紀摺發交常青閱看並諭令常青到彼嚴查黃仕簡所帶本標官兵及臺灣原有官兵現作何用因何復將叅將潘韜兵丁

三百名留守郡城之處一併查明據實叅奏並將何日已抵臺灣作何籌辦剿捕情形迅速具奏

同日郝壯猷奏言准水師提臣黃仕簡移撥各營兵丁二千餘名前赴南路進剿一路搜捕十九日過大湖一帶地方東南有賊匪數千人前來禦敵臣督率將備弁兵施放鎗砲自己至申打死賊匪三百餘人官兵奮勇追趕生擒賊夥二十五人訊明正法時已黃昏就地剴營夜間賊匪復來撲營

被官兵施放鎗砲打死百餘人賊夥退遁隨即發兵
搜捕併差探賊匪現窩聚新園庄地方二十三日
派令各營將脩帶領弁兵義民三路夾攻鎗砲打
死賊匪三百餘人奪獲鎗砲器械賊匪逃散隨將
賊窠草藁數百間盡行燒燬仍收回大湖營盤二
十四日午刻聞東南有砲聲賊匪猝至隨即派撥
官兵殺賊施放鎗砲打死賊匪數十人生擒一名
訊明正法臣連日發兵在各庄搜捕二十九日賊

人分路前來攻營當即分兵對敵鎗砲齊發賊即敗走官兵追趕殺賊匪數十人奪獲砲位刀鎗等械二月初二日賊匪復糾集數千人大砲六七位從東北東南正南三處來攻營盤臣分遣官兵對敵自卯至午施放大砲連環鎗打死賊匪二百餘人賊始稍退生擒一人訊明正法未刻復來撲營隨放鎗砲趕殺直至戌刻方遁連日打仗我兵被賊鎗砲受傷亦有十餘人現在賊匪尚猖獗查

南路一帶庄社俱有賊匪倚山傍海聚散靡定臣
急欲前進因連日對敵俟剿洗淨盡星即前赴鳳
山恢復城池奏入

上命軍機大臣傳諭常青曰臺灣不過海外一隅其戶
口不及內地之繁庠林興文等倉猝起事該處民人
必不肯盡被脅從且節據該提鎮等奏各路攻剿賊
匪俱有義民鄉勇幫同出力是百姓中被賊脅誘入
夥者究屬無多乃該提鎮節次奏報摺內動稱賊匪

萬餘及數千不等若如所云豈非臺灣之人全係賊黨而每次打仗又動殺賊數百或稱殺賊無算如果屬實賊匪已幾於殲戮靡遺何以尚稱其勢猖獗看來皆由緣營將弁飾詞誑報既可掩其惟怯又可藉以冒功前已有旨令常青秉公嚴查該督到臺灣後務遵前旨確實查明勿任朦混至此事總由黃仕簡任承恩因循畏蒞以致遷延時日賊人因得乘隙復相糾結蟻聚成羣未得速就撲滅常青到臺灣後務

宜悉心調度加之鼓舞若能就現有官兵一鼓殲滅賊衆固屬甚善倘必須添兵接濟即遵昨降諭旨一面具奏一面飛調內地暨粵省附近兵丁應用以期妥速藏事若賊匪本不甚多竟係綠營官弁增數誑報必當據實嚴叅示儆勿稍迴護

欽定平定臺灣紀畧卷八

欽定四庫全書

欽定平定臺灣紀畧卷九

二月二十九日

丁卯

常青奏言據蚶江通判陳惇等

將拿獲逆匪劉志賢陳榜即陳榜解送到泉

臣提

犯研訊緣劉志賢即劉鼎鏐又即前獲賊目高文

麟等供出之劉賢士籍隸惠安於乾隆三十年往

臺充當彰化縣兵房書辦與林爽文王芬曾經認

識陳榜原籍漳浦四十六年往臺在彰化縣大肚

地方肩挑度日與在臺居住之許溪同縣相熟五
十一年十一月初間許溪邀陳傍至王芬家同入
天地會迨該縣俞峻會營查拿林爽文起意抗拒
王芬邀陳傍入夥劫營攻城陳傍俱係在場至劉
志賢並非會內之人當林爽文攻陷彰化該犯躲
避在家被王芬拿住因係泉民在臺充役年久可
以招集泉衆令其入夥劉志賢亦即依從林爽文
許劉志賢為偽海防同知刻給木戳一個時有前

經拿獲解放之賊匪陳高往提隨行十二月初四日劉志賢赴鹿仔港住守因傳戲班不到將戲子杖責又將存倉官鹽散賣并勒派船戶每隻番銀二三圓不等嗣陳傍因見事情重大欲圖逃走十二月初六日詭稱避難回籍附搭詔安縣商船於正月初十日至漳浦小銅山地方登岸至舊識之林篤家留住當經漳浦縣兵役拿獲至劉志賢因陳高拿獲正欲竄匿即經知縣黃嘉訓訪獲報明

陸路提臣任承恩解回內地審辦查劉志賢既受偽職當彰城攻陷之時恐有勾結內應而陳傍既入會黨則天地會起自何年共有若干人應知確實且有潛入內地探聽信息情事反覆究詰劉志賢堅供並未預為內應陳傍亦供入會未久止見林爽文等二十餘人天地會名目起自何年共有若干人實不知確實其私渡回漳亦非探聽消息屬實即將劉志賢陳傍二犯正法梟示劉志賢所

供之陳高先經解部容留陳傍之林篤雖據陳傍
供明並不知情但係從賊潛回之匪犯並不查明
遽行收留飭縣另行究詰犯屬家產查明照例辦
理詔安船戶不知姓名無從拘提陳傍雖據漳浦
縣兵役自行拿獲但小銅山有無口岸飭查到日
再行核辦再閩縣商船戶陳永泰船隻渡載海壇
營官兵一百六十四員名赴臺剿匪於乾隆五十
一年十二月二十九日駛至澎湖洋面陡遇狂風

船舵刮折漂沖外礁擊碎淹沒把總一員兵丁七十九名巡檢一員跟役三名船戶水手扳挾板片得生弁兵八十四名內因傷身故一名受傷病重十七名所載軍械藥鉛等項俱經沉失臣飛飭將得生弁兵給發銀米另配船隻赴臺面確查淹沒各官兵姓名并打撈屍身及沉失軍械分晰具報

同日徐嗣曾奏言連日接閱臺灣文報賊匪林爽文等或云在大里杙庄或云在斗六門或又言在

三貂社等語此時賊首要犯多在諸彰北淡之間而竹塹艋舺附近之大姑陷擺接等處亦有匪黨時出肆擾陸路提臣任承恩總兵柴大紀現在鹿港諸羅分路進兵並經提臣黃仕簡添派總兵晉吉保等前赴協剿兵力厚集撲滅自易而北淡之宛裏莊賊匪據署守備董得魁稟報督率官兵義民剿捕淨盡擺接等處亦據副將徐鼎士等具稟會商進剿是北淡一路已有官兵率領義民協同

剿禦釜底遊魂更易洗蕩惟是大里杙等處均係
內山倘賊匪潛入生番勾結滋擾搜捕未免費力

臣查署守備董得魁稟報剿捕宛裏庄賊匪之時
曾帶有通事瓚瑛及弓箭番一百名甚得其力此
等熟番之中必有素悉生番山徑者臣已密飭徐
鼎士督同董得魁等購遣妥幹通事帶領熟番入
山曉諭許以重賞令其遇匪竄入即行縛獻一面
飛咨督臣常青及提臣黃仕簡相機搜捕務盡根

株

同日任承恩奏言二月初五日署都司張奉廷署
守備陳邦光李漢升等分巡彰城一帶午刻至大
肚山見賊衆屯聚山梁招旗放砲迎拒官兵當令
兵丁鄉勇埋伏田坎誘至山脚下三面攻殺鎗砲
並施斃賊甚衆並將騎馬一賊馬匹打倒鄉勇陳
喜隆乘勢斬獲首級官兵義民并力截殺又擒獲
手執紅旗賊目謝華一名賊夥林芳一名奪獲賊

械多件當將獲賊二名嚴訊據供俱是林泮上年七月內邀入會的曾厯次攻城打仗那被殺的卽是林泮是林爽文堂兄手下約有三四百人住在大肚街今日同夥出來在大肚山瞭望堵禦官兵不料抵敵不過就被拿獲等供當將林泮首級梟示該二犯卽行正法鄉勇陳喜隆從優獎賞又初六日賊匪潛來放火燒燬海邊漁寮在港望見火起臣卽親督官兵由沿海一帶防範分撥遊擊穆

騰額守備潘國材署守備陳邦光等同官兵義勇
由近海之崙仔頂溪口厝等庄堵禦賊匪擁衆前
來將備等即施放鎗砲打敗賊匪兵民奮力追殺
斬首二十一顆奪獲賊械烏鎗竹串刀棍賊旗多
件又都司馬元勲守備常萬雄沈勇雲本月初六
日黎明聞賊衆在瓦窰庄地方放大隨帶官兵鄉
勇前往該處剿殺連放大砲打死賊匪數十人餘
賊潰散擒獲匪犯陳鞭何晏二名次日寅刻賊匪

數千又來攻擊營盤馬元勳等督同官兵迎敵賊
忽散忽聚恃衆擁前官兵用進步鎗砲傷斃賊人
無算賊衆大敗奪獲鎗刀等械多件隨將拿獲二
犯正法一面咨報督臣常青查核仍督率各將備
加意巡防堵禦并會商水師提臣黃仕簡籌剿賊
窠均奏入

上命軍機大臣傳諭常青李侍堯徐嗣曾曰劉志賢一
犯前有旨令該督等派員解京審辦今既據訊明並

無緊要情節業已先行斬梟自因未接前旨如此辦理但該犯身充縣書受賊偽職其子嗣未便寬宥即不至擬以重辟亦當發往伊犁給厄魯特為奴以示懲儆著常青於抵臺灣後即查明遵照辦理又據前奏海壇官兵赴臺灣剿賊船至澎湖洋面陡遇狂風淹斃各員弁兵丁等殊堪憫惻著常青查明照例咨部分別議卹其受傷病重者即酌量加賞用示軫恤再前因徐嗣曾等以覆奏事件由六百里馳奏徒勞

驛遞曾降旨飭諭但現在賊匪尚未撲滅著傳諭
徐嗣曾如目下得有剿賊捷音及緊要信息仍當由
六百里迅速馳奏其尋常覆奏事件即遵前旨不必
紛紛馳遞以省郵傳至李侍堯由京赴閩後僅於浙
江途中拜摺一次雖該督到泉州廈門尚須時日然
此時自早入閩境接見屬員及閱看稟報於近日剿
賊情形亦必得有信息即當於入境後隨時具奏何
以未有隻字奏及豈該督竟不知朕懸盼軍報宵旰

焦勞無時或釋耶

三月初一日

已

黃仕簡奏言二月初三日接任承

恩咨稱現在鹿港分兵進攻賊窠需添兵力查副

將徐鼎士帶兵一千五百名已由北路八里坌進

口可否酌撥遣用

臣

隨飛飭徐鼎士如北淡水現

在寧貼除酌留官兵防守外其餘帶赴鹿港聽任

承恩調度合計北路官兵共有七千名已可併力

會剿至赴南路剿匪之總兵郝壯猷等即據咨報

大湖一帶乃賊匪出沒之所聚散靡常勢甚猖獗
應先剿洗正月二十四二十九及二月初二初三
連日打仗賊匪被鎗砲打死計數百人併奪獲鏹
刀鏢器等因臣查南路賊夥雖疊被官兵剿殺但
崗山一帶賊勢尚屬鴟張亟應剿洗淨盡現在派
撥官兵即日由崗山後路抄襲與總兵郝壯猷等
會合夾攻剿洗後立赴鳳山攻復城池又總兵柴
大紀收復諸羅後拿獲偽先鋒吳映偽將軍侯辰

張請先及賊夥廖東阮贊五名檻解到郡發縣審訊嗣因吳映侯辰張請先三名先後病危即行處決示衆惟是臺地辦理多人實恐不便嗣後拿獲之犯陸續渡海解交督臣訊明正法應行緣生要犯家屬或在臺灣或在內地查明下落密為存記隨後會同督臣逐一查拿妥辦再南路營叅將瑚圖里因乘馬追賊被賊乘虛入城兵丁衝散之後瑚圖里即到郡城協同堵禦現在總兵郝壯猷前

赴南路進剿將來功罪如足相抵事竣後聽督臣查明核辦

同日普吉保奏言二月初四日行抵諸羅隨詢柴大紀近日賊匪並未復來侵擾惟前路大埔林一帶
有賊匪匿踞是以諸彰路道不通臣面商柴大紀
諸羅既係無事但提臣任承恩前報林爽文潛回
大里杙勢復猖獗應帶兵赴鹿港會同任承恩相機
合力進剿則南北聲勢可通隨於二月初七

日自諸羅帶兵前進至大埔尾地方有賊匪千餘人
迎拒官兵目即率副將格綢額署遊擊唐昌宗督
兵攻剿一面令副將林天洛抄截賊人後路鎗砲
打死賊匪甚多擒獲手執紅旗賊目張貴一名賊
夥莊光喜林超二名斬獲賊首一十四顆小旗銅
鑼刀矛等件又署遊擊唐昌宗奪獲砲一門隨訊
拿獲賊人林超供今日拒敵官兵是林英文令葉省
帶領千餘人在此庄內住了七八日此庄內男女

不知何時撤去隨飭官兵將庄燒燬初八日行至
鹿場地方劄營黃昏時東面有賊前來在竹林內
吶喊放鎗官兵奮勇前攻衆賊敗走活擒賊匪一
名初十日行抵鹿仔港隨將沿途所獲賊匪張貴
等四名訊明正法現在與提臣任承恩整合兵力
併剿賊窠聽候調遣均奏入

上命軍機大臣傳諭常青李侍堯曰此時初起時柴大
紀止能於郡城扼要處所防守堵禦自不能進搗賊

窠悉數擒捕今大兵雲集黃仕簡惟安坐郡城留兵
衛已且稱臺灣拿獲之犯本處不便辦理多人更不
成話即此足見其畏蒞任承恩亦以巡防堵禦為詞
分派弁兵零星打仗俱不親身會合前往剿捕似此
辦理何時事了耶從來用兵之道合則勢盛分則力單
黃仕簡任承恩帶兵前往不特官兵不應零星分撥
即鄉勇義民等亦應加之鼓舞俾與官兵團聚一處
庶伊等見軍威壯盛益加奮勇踴躍從事乃該提督

等如此漫無籌畫致兵氣不能振作倘義勇等稍有失利其良善者即不至從賊亦難望其仍前出力其狡黠之徒甚或轉為賊用別滋事端尚復成何事體著將本日硃批普吉保各摺發交常青閱看該督一到臺灣後即將交查黃仕簡任承恩遲誤之處詳細確查並本日批出情節面加嚴審具奏毋稍存迴護再任承恩摺內所奏各路之賊動稱數百至數千不等而斬獲賊匪首級不過一二十顆生擒者亦不過

一二名看來皆不實在並著常青一體嚴查毋任朦
混又昨據徐嗣曾委員將受賊偽職之逆犯高文麟
等三名解到令軍機大臣研審究出林爽文等與通
事杜美有勾結生番希圖將來竄匿內山情事著將
原審奏片發交常青閱看令其嚴密搜查勿致首要
各犯遁入內山致稽顯戮事竣後即將內外界址重
加勘定以期周密不至再滋事端其平日防守疎虞
之文武員弁一並查叅並將杜美一犯嚴拿務獲解

京審辦

初四日

壬申

常青奏言新任督臣李侍堯於二月十

七日抵泉

臣

交卸督篆將現在辦理事宜向李侍

堯詳晰告知并將到臺應辦事務面為商酌後隨

於二月二十日自泉起程前赴廈門登舟候風飛

渡至臺地情形現又據黃仕簡咨稱賊匪林爽文

等因大兵到臺退守窠穴於諸羅之斗六門及大

里杙等處羣聚滋擾匪黨衆多任承恩所帶之兵

勢覺單薄經黃仕簡又將續到之延建等營官兵
內分撥一千六百名派令總兵普吉保副將格綱
額林天洛等帶領馳赴諸彰會同總兵柴大紀並
知會任承恩併力剿捕計此日正在搜洗之時臣
惟有殫竭駑駘督同黃仕簡悉心調度將首惡林
爽文及要緊賊目迅速擒拿解京審辦其餘醜類
務盡根株並設法預籌不使得與生番勾結以致
日後再有滋擾之事再臣辦理善後事宜需員差

遣因酌派泉州府城守營叅將特克什布建寧府
同知楊世綸候補布政司經歷葉寶書試用吏目
楊兆榮從九品王澤臨五員帶同前往抵臺之後
一切文移往來均關緊要并商之督臣李侍堯將
福建藩司庫貯巡臺御史關防一顆佩帶行用以
昭信守

同日李侍堯奏言於入閩途次接督臣常青來札
並抄寄節次摺稿知提督黃仕簡任承恩抵臺後

連次攻剿多有斬獲至福州晤撫臣徐嗣曾至泉州晤常青又詳細詢問現在兩提臣南北兩處信息雖已從海邊彼此知會而腹地道路尚未相通蓋緣任承恩所駐鹿仔港正近大里杙賊窩匪徒最多官兵屢剿尚在抗拒而黃仕簡在南路又有大湖等處賊匪正須剿殺是以尚未聯絡旬日以來雖未續得信息想必又加剿殺數次今常青於本月二十日起程俟到彼密看情形督率兩提臣

視賊所聚處用全力痛剿一二次彼么膺烏合非
素有結約必死之心自當畏死潰散然後分路搜
捕不日可以戡事今內地所以接應者口糧最為
緊要臣詢常青徐嗣曾已飭各州縣碾米四萬五
千石分貯廈門泉州等處現在尚未解到臣一面
嚴催以備陸續應用不致有誤至閩省現在情形
途次所見極為寧貼秧田已長數寸蓄水翻犁各
勤農業又細訪漳泉一帶人情亦皆安靜臣但當

靜以鎮之而密以稽查口岸為要務不敢稍有疎
失再臺匪猝起時所有調兵各事宜自不得不絡
繹馳奏今兩提臣已過臺灣常青又往督辦所有
軍事業經常青等專摺具奏其知會到臣者應請
不復再奏如臣另有聞見及常青等所知會臣另
有商辦者始行馳奏似可稍省馬力均奏入

上命軍機大臣傳諭常青李侍堯曰前以賊匪不過烏
合之衆無難立時撲滅是以曾諭常青到臺灣後即

令任承恩來京常青在彼督同黃仕簡辦理搜捕事宜今任承恩黃仕簡並不帶兵前進甚不如前竟不可恃矣即如常青摺內所稱賊匪退守巢穴於諸羅之斗六門大里杙等處羣聚滋擾任承恩所帶之兵勢覺單薄又李侍堯奏稱現在兩提臣南北兩處信息雖已從海邊彼此知會而腹地道路尚未相通等語賊匪既團聚斗六門大里杙等處兩提督如果彼此知會奮勇夾攻軍威壯盛自可迅搗賊窠何至賊

匪得負隅團聚文報尚從海邊知會伊二人觀望遲
悞之咎已無可解免屢經降旨交常青到彼嚴查叅
奏該督此摺自係未接諭旨時所發計目下該督已
可到彼務宜遵照秉公嚴審據實具奏不可稍事姑
息至一切剿賊善後事宜全在常青妥協經理該督
須於奮勇之中加意持重以期尅期戡事慰此塵懷
其兵丁接應口糧及稽查內地各口岸亦係要務李
侍堯向能辦事自能就近妥辦不至貽悞所奏臺灣

軍務既由常青專摺具奏李侍堯即不復由驛馳奏
所見甚是自應如此以省驛馬之勞

初五日

癸酉

上命軍機大臣傳諭常青李侍堯曰昨據李侍堯奏兩
提臣南北兩處信息雖已從海邊彼此知會而腹地
道路尚未相通等語復查看總兵普吉保摺內則稱
由臺灣郡城帶兵先抵諸羅於初十日到鹿港與任
承恩併籌勦賊雖該鎮於大埔尾等處曾遇賊打仗

然既由郡城直達鹿港並未為賊所阻看此情形自係賊人蟻聚斗六門大里杙等處馳遞文報隻身往來或懼其潛出擾害若帶兵前往亦無虞中途梗阻想李侍堯初入閩境無由即知彼處情形係地方官稟報即據以入奏其所稱道路未通之處本屬未確今普吉保既可帶兵由郡城前往鹿仔港豈黃仕簡任承恩獨不能行乎且黃仕簡帶兵到彼賊人並未再來可見賊知官兵勢盛已畏避不敢復來即使賊

人復至郡城黃仕簡正可迎頭截殺不應轉避賊衆
豈賊人一日不至黃仕簡寸步不進乎況昨據解到
賊夥楊咏等有林爽文與通事杜美勾結生番希圖將
來竄入內山之供倘賊人竄入內山日久不出黃仕
簡任承恩亦終歲在郡城株守竟不往內山搜捕耶
昨據該督奏於二十一日由泉州起身前往若風色
順利計此時早到臺灣何以未見具奏此事全在常
青妥協督辦迅奏藏功朕盼望甚切不可如黃仕簡

任承恩之漫無籌畫坐視貽悞也

初八日

丙子

任承恩普吉保同奏言本月十三日寅

刻賊匪林爽文帶領賊衆繞道大肚山由番婆庄

來攻鹿仔港

臣

任承恩即督令遊擊穆騰額等帶

領官兵鄉勇前往堵禦

臣

普吉保帶領副將林天

洛等抄截賊後行至番仔溝見賊勢甚衆正在放

火燒庄官兵奮力直前鎗砲並施打倒賊匪甚多

賊衆懼退

臣

普吉保率兵從旁用鎗砲橫擊賊匪

大敗四竄當即救熄庄房查擒獲匪夥十六名奪
獲銅砲大小鐵砲鳥鎗藤牌旗刀矛箭藥鉛多件
馬三匹并於賊屍搜獲書信三紙一係結盟底藁
餘二紙俱係陳傳代林爽文約夥攻劫鹿仔港埔
心等處臣等即將所獲賊犯鄭寶等逐加嚴訊據
供都是去年林水邀入會的二月初六日陳傳寄
字與林水齊集衆人往大里杙會合初九日我們
隨同林水到大里杙十二日林爽文約陳泮周振

興陳道等領了三千多人去攻浦心庄我們共有
五千多人隨了林爽文來攻鹿仔港林水係頭目
騎著紅馬打頭陣林爽文騎白馬在後催人行至
番仔溝正在燒庄不料官兵趕到抵敵不過林水
被砲打下馬林爽文先自跑了當令認明林水首
級梟示一面將該犯等正法鄉勇從優獎賞又署
叅將馬元勳等遇賊匪來攻埔心約有三四千人
馬元勳等督同官兵鄉勇施放鎗砲賊人敗退奮

力追殺割獲首級九顆耳記辮子共六十二箇在
賊屍搜出書信二封奪獲賊旗藤牌鉛藥等項并
擒獲女犯一口其書亦係陳傳代林爽文約夥之
字當將女犯發訊據供係盧陳氏今年正月裡被
賊夥黃七擄去服侍伊妻陳金娘因屢次被官兵
鎗砲打死甚多今日陳金娘叫伊露體出陣要厭
鎗砲不想就被拿獲等供隨將該犯婦正法賊書
五紙咨送督臣常青查核再准提臣黃仕簡咨稱

檄令副將徐鼎士酌留官兵駐守淡屬餘兵亦令
來彰協力會勦等因普吉保兵已全到臣即會商
先行分劄要地進扼賊吭一俟副將徐鼎士統兵
到日即當審察形勢奮勇會勦至擒獲賊夥鄭實
等十七名應解赴內地審辦第彰屬地方現乏佐
雜人員差委弁兵又在勦賊之際逐起押解實屬
乏人久禁恐有疎虞因審明均係餘夥即行正法
仍彙供移咨督撫二臣察核奏入


上命軍機大臣傳諭常青李侍克曰林爽文既敢親至
鹿港滋擾即係自來就死任承恩正當親帶弁兵迎
頭痛加勦殺將首惡擒縛則其餘附和自必紛紛瓦
解何以任承恩並不親身擒捕僅派令遊擊等與賊
打仗且任承恩與普吉保現在一處普吉保既帶兵
剿賊而任承恩竟安坐鹿港豈欲因人成事抑待賊
自斃乎殊出情理之外況賊人將所掠婦女逼令露體
出陣冀厭鎗砲可見賊勢已窮行徑可笑無難一鼓

職擒乃任承恩一味畏葸遲延不進看此情形現在賊匪尚未撲滅竟係任承恩與黃仕簡始終兩相觀望貽誤緊要軍機向來黃仕簡辦事尚知奮勉此次因有任承恩同往致生觀望設任承恩不赴臺灣黃仕簡專辦此事無可推諉轉未必恒怯至此任承恩斷不可再留該處致墮士氣著常青一抵臺灣即傳旨將任承恩解任飭令即行赴京候旨其陸路提督員缺前有旨交郝壯猷暫行署理但行軍之際須將

奮勉出力之員加之鼓舞以勵戎行並著常青於普
吉保赤壯猷二人內察看孰為出力一面奏聞一面
將陸路提督即行交與署理以示鼓勵至黃仕簡如
查明貽誤屬實亦不可留於該處即遵前旨將伊解
任送回內地請旨辦理其水師提督印務即交柴大
紀暫署候朕另降諭旨

臣等謹案提臣黃仕簡到臺灣後賊匪已不敢窺
伺府城即凡遣兵堵禦之處一經勦殺無不奔竄

可知么膺之衆蜂屯蟻聚本屬無能至使婦人裸
體以厭鎗砲其伎倆之窮益見矣如以兩提督親
臨行陣官兵義民更必奮勉用力賊衆望風膽落
搥穴擒渠自如摧枯拉朽乃竟彼此觀望坐失機
宜昧於圖功進取抑亦自貽伊戚者歟



欽定平定臺灣紀畧卷九

欽定四庫全書

史部

欽定平定臺灣紀畧卷十二

內閣中書臣沈鵬覆勘

武英殿纂修中書臣彭元琬

欽定四庫全書

欽定平定臺灣紀畧卷十

三月十一日

包

李侍堯奏

言旬日以來尚未續得

臺灣信息惟於進口商船密為探訪據稱賊匪出

沒無常尚時來滋擾等語今常青於二十二日已

至廈門一得順風即當開駕至所取兵糧軍械係

臣之責必須使軍前事事應手方可尅期藏事查

臺灣府城固屬根本而係承恩在鹿仔港普吉保

徐鼎士又帶兵前往會剿所有軍糧器械若解至府城再行轉解此數百里內既費運脚又慮疎虞是以臣委員分路進送在廈門澎湖者徑解府城在泉州者即由蚶江解往鹿仔港務期陸續接濟不致缺悞再接任承恩來咨知十三日將賊匪大加剿殺並搜出賊屍所帶結盟底稿及糾約攻劫等字共五紙移送前來謹封呈

覽但任承恩摺移稱有五紙今查原色內只有四紙合

併申明至楊廷樺補授臺灣府知府現已隨同常
青前往臺灣又許阿協等在漳州被誘入夥可見
天地會邪教閩省內地亦早有之此等匪徒私立
會黨為時已久勾引必多目下若即跟查民間又增
一番驚擾臣當預為訪察存記俟臺灣逆匪辦完
後與緣坐家屬之在內地者一同辦理並訊明此
會實係何年創始即將歷來失察官員逐一查叅
並通查各屬有無控告搶奪而地方官沉擱不辦

之案另行叅奏至上年辦理楊光勛等案內所稱
添弟會明係換以同音之字意欲化大為小臣細
查此案原卷有臺灣鎮總兵柴大紀臺灣道永福
奏稿一件臺灣府知府孫景燧稟一扣俱係添弟
字樣但該守在上年閏七月十七日稟出而該鎮道
已先一日具摺入奏則該鎮道斷不得諉為不知
又卷內有照抄該犯記名號簿雖已寫明添弟二
字然簿內不過數十人明係就現獲人犯捏造成

簿是改換字樣惟應于該鎮道是問今該鎮道俱
在臺灣辦理剿匪之事應亦請俟事竣確查何人
主見據實叅奏再上年十二月十二日有臺灣竹
塹營外委虞文光兵丁王元浩搭舡到泉州向提
臣任承恩求救因無牌票移咨前督臣常青查辦
茲據該提鎮移咨及守備董得魁稟內有外委虞
文光查無下落之語是該弁等實係臨陣逃回捏
同掩飾臣提訊據供上年十二月初七日該弁隨同

守備董得魁到中港堵禦被賊衝散因與同鄉兵
丁王元浩商同逃回內地又恐日後事發有干重
罪遂到提督衙門捏稱奉差求救等語並訊據兵
丁王元浩亦供認不諱隨將該二犯正法又閩省
調撥官兵進剿臺灣逆匪所有副將叅遊多奉派
出師今內地各營僅存叅將七員遊擊七員或一
人兼署數缺甚至汀州金門二鎮現以守備而代
辦摠兵之事既于體制非宜且彈壓地方亦無以

示嚴重閩浙兩省俱係

臣

所統轄今擬于浙省副

將叅遊內酌派四五員飭速來閩備供委署要缺

一面移咨提

臣

陳大用就近酌量調撥造冊送部

俟臺灣剿匪事竣後仍飭各回本任緣係隔省調

用武職人員理合奏明奏入

上命軍機大臣傳諭常青李侍堯孫士毅曰黃仕簡自

三月初一日奏報之後又閱十餘日未據續有奏報

該提督所辦何事至任承恩竟安坐鹿港意欲因人

成事殊出情理之外郎如搜出賊屍所帶結盟底稿
及糾約書信自應隨摺進呈乃轉行咨送總督其信
稿五紙又只有四紙足見其悞事不小再柴大紀于
賊匪起事時保守郡城尚能奮勇近亦不能如前次
之奮勇出力又一向並無奏摺自係因該提督等互
相觀望該鎮等亦心生懈怠是黃仕簡任承恩之咎
更無可諉着常青一抵臺灣即遵照節次諭旨嚴切
查叅毋得稍存瞻徇至閱搜出賊匪所帶書信內有

由休生等門會齊之語賊匪么膺烏合尚知八門遁
甲之法然此亦不過鬼蜮伎倆藉以煽惑人心官兵
以順討逆以正祛邪毋難撲滅淨盡此事惟在常青
相機調度以期迅奏膚功又閱搜出賊匪書稿內有
廣東鳳花亭高溪菴馬溪廟洪二房和尚及朱姓人
犯曾諭令孫士毅密速查拏前據該督覆奏加緊嚴
緝至今曾否拏獲未據續行奏報此係要犯著孫士
毅務須嚴飭所屬設法跣緝毋任遠颺漏網

十二日

庚辰

任承恩普吉保奏言八卦山一帶賊匪

不時出沒窺伺

臣

等密商必須出其不意即行痛

剿以挫其勢隨即分派官兵于二十一日即到賊

境賊衆遍山漫野抗拒官兵

臣

等即令施放鎗砲傷

斃賊匪數百名賊衆奔潰

臣

普吉保親督署遊擊

唐昌宗乘勢搶上八卦山扼賊來路

臣

任承恩親

督副將林天洛遊擊穆騰額清查彰城內外窩藏

賊匪正在查拏間附近山凹之賊約有七八千人

蟻聚四出

臣

普吉保即在山梁督率官兵開放鎗

砲斃賊甚多乘勝壓下

臣

任承恩督兵分處夾攻

殺賊無數擒獲賊犯二十七名奪獲賊馬五匹鳥

鎗七桿賊旗三十二桿簾牌挑刀長鎗竹串多件

時已傍晚不便劄營仍行撤回各營所獲人犯內

林家齊一犯審係林爽文族長且訪聞該犯前曾

誑哄彰化文武官願將林爽文帶來投到以致猝

不設脩釀成巨案實為此案要犯應即解送督

臣

審辦餘犯即行正法至陣亡帶傷各兵丁鄉勇分別記功獎賞事竣之日彙冊造報_臣等正待諸羅淡水兩路兵到籌辦會剿二十三日據臺灣鎮_臣

柴大紀咨以諸羅賊匪張看葉省屯聚斗六門應須攻剿所帶各官兵即在諸羅嚴加防守搜捕又副將徐鼎士等稟稱淡水賊匪負險猖獗現帶官兵分路進攻各等因查賊匪尚在蔓延南北官兵未能會合一面咨報督_臣常青核示仍飛商水師

提臣黃仕簡籌辦會剿奏入

上命軍機大臣傳諭常青李侍堯曰任承恩一味遷延
觀望直至此時始同普吉保親往帶兵進剿但此次
攻剿賊匪亦因普吉保親督遊擊等進攻南関口八
卦山各賊庄柵而任承恩不過于西門一路從後策
應彰化城內外搜查窩藏賊匪並未親至賊巢其所
稱出其不意派兵痛剿蓋亦係普吉保之意任承恩
但因人成事如許多日所辦何事且該提督前此既

存心恒怯則此次所稱親督官兵分路夾攻之處恐亦未可盡信況賊匪既屢經官兵剿殺而此次任承恩所奏摺內又稱官兵奮力殺賊無數是賊匪幾于殲戮靡遺何以摺內又稱賊勢尚在蔓延南北官兵未能會合看來皆由綠營將弁飾詞謊報既可掩其恒怯又可藉以冒功所言殊不可信着常青即將任承恩曾否親自帶兵赴八卦山打仗及所報殺賊數目是否確實秉公嚴查如有捏飾虛報情節即行據

實叅奏

同日孫士毅圖薩布同奏言查究天地會邪教自
拏獲許阿協等訊供後即密咨閩省訪查勾引入
會之漳州人賴阿邊梁阿步等續據饒平縣程煥
又查獲該縣林功裕一犯訊係閩省平和縣林邊
鄉人林三長于五十年六月間勾引入會又惠來
縣地方盤獲陳琴等七名潮陽縣地方盤獲林海
瑞等二十九名均係福建漳州府屬人民雖訊據

堅供欲赴西洋噶喇吧地方謀生因遭風駛船至
粵並不知有為匪結會情事但正值臺灣逆匪滋
事之時該犯等胆敢糾約多人偷越出口形迹可
疑臣亦密咨閩省存記統俟事定後分別辦理至
前准閩省咨拏臺逆案内供出夥匪有張隆生一
犯籍隸廣東大埔縣當飭該縣查稱張隆生在臺
生長原籍並無的屬并另行訪有張慶捷張興生
亦在臺灣又與逆犯張隆生同籍同姓有無逆逆

均未可定具其族人張永玉張丹成張崇秀亦俱

在臺難分良歹

臣

等現在不露圭角密行存記再

閩省續獲從逆匪犯鍾祥等七名內劉實及林天
球二名俱係廣東饒平縣人恐原籍尚有應行緣
坐之犯現在慎密飭查未據查明稟覆至後溪鳳
花亭洪朱二犯尚未查有實在下落

臣

等督率惠
潮各州縣嚴密訪拏不敢稍涉張皇致無實際再
查天地會根源如果起于粵東惠潮二屬案犯必

多應需大員專司辦理其時新補惠潮道圖畢赫
尚未到任是以奏明行調臬司姚榮赴潮督緝茲
圖畢赫業已到任察其才具頗覺靜細安祥現值
秋審將屆臬司係主政之員必須在省公同商酌
臣等已將緝匪之事詳諭圖畢赫不動聲色就近
督率密查札調臬司姚榮回省辦理秋審奏入報
聞

十三日辛巳李侍堯奏言北路鹿仔港等處兩月以

來雖據報連次打仗俱有斬獲但於賊匪來擾時盡力堵殺尚未能直入賊巢痛加剿洗今南路已克復鳳山軍聲益壯北路賊匪自必聞風震懾如鳳山無須重兵彈壓又可用全力專注北路以期迅速掃除常青已於二月三十日起棧放洋即日
到彼鼓勵振作自必易于奏捷又查出正月內守備董得魁稟送逆匪林爽文偽示三紙閱之不勝髮指該犯于光天化日之下胆敢私立此等悖逆

名號真乃罪大惡極謹封固呈

覽奏入

上命軍機大臣傳諭常青李侍堯曰官兵已將鳳山縣城收復是南路賊匪業經潰散竄逃無難收剿淨盡黃仕簡卽應督率將弁迅赴北路會合任承恩分路夾攻以期一舉蕆事乃竟仍安坐郡城按兵不舉而任承恩亦惟於賊匪來擾時派撥弁兵零星堵禦並未親身帶兵直抵賊巢李侍堯心思周到自早已看

出伊二人之悞事但以黃仕簡承襲公爵久任提督
素昔恩遇較優而任承恩係任舉之子朕軫念伊父
前勞特加錄用擢至提督不免為之稍留地步是以
不肯直奏但該提督之因循貽悞朕于數千里外尚
早經洞燭况李侍堯駐劄泉州耳目較近而所屬文
武員弁內亦必有議論及此併探聽情形稟報者現
已節次降旨令常青嚴行查辦李侍堯如果有所見
聞即據實具奏不必稍為瞻徇諱飾也至逆匪林爽

文竟敢自稱年號其悖逆之處罪大惡極覆載不容
俟將來逆首生擒必當嚴行盡法以申國憲而快人
心此時常青惟當申明紀律鼓舞士氣俾壁壘一新
人人用命以期擒拏首夥迅速歲功

臣等謹案兵貴神速二月二十一日任承恩有八
卦山之捷郝壯猷亦以此日收復鳳山兩提臣正
可乘此銳氣親率將士打通南北道路會剿賊巢
乃任承恩因柴大紀徐鼎士兩路之兵不能會合

即遷延不前而黃仕簡又以收復鳳山為己功不思乘機剿賊以致逆匪復肆鴟張我

皇上不以得有勝仗恢復城池為有功而益明著其觀望之罪賞罰嚴明皆出于

先幾獨斷益仰

睿慮之無所不周也

同日徐嗣曾奏言二十八日任承恩咨稱本月十二日與普吉保分督官兵殺賊甚衆是該處兵力

已足從此開通道路即可與提兵柴大紀合兵會剿內地堵拏逆匪尤為緊要臣于二十八日前赴福州府屬之福清長樂及興化一帶沿海口岸細查兩月以來各該處並無臺灣海船進口臣恐漁戶小船或有貪圖微利在於海邊接渡逸匪並恐荒嶼淺灘賊匪附搭海船經過偷越登岸細加訪察現在實無竄逸內渡之人茲于三月初二日興化途次聞官兵收復鳳山賊匪四散奔竄鳳山距

澎湖甚近廈門一帶尤為緊要臣即星馳前赴廈門等處親督查拏凡有逆匪偷渡立即擒拏務獲不使一名漏網奏入報

聞

十四日

壬午

黃仕簡奏言總兵郝壯猷於二月初九

十二等日帶兵剿捕各庄鎗砲打死賊匪數百人奪獲刀械等項查岡山崙仔頂小新園大湖各處俱係賊藪勢甚猖獗臣於十三日添遣官兵分擊

夾攻而臺灣道永福亦派撥義民隨赴大湖一帶
協同剿捕自十三日未刻起殺賊連宵達旦鎗砲
打死賊匪數百人十五日官兵分路直搗賊巢奮勇
追殺生擒賊夥併將賊巢草藪燒燬臣又遣福寧鎮
標遊擊延山帶兵五百名併義民隨郝壯猷進攻
鳳山之北遣臺灣水師遊擊鄭嵩帶兵五百名由
海道至打狗山繞攻鳳山之南二十三日據總兵
郝壯猷等報稱二十日行至橋仔頭鎗砲打死賊

匪甚多二十一日拒鳳山極力攻城遊擊鄭嵩亦到會合夾攻賊匪由北門奔逃併拾獲盔砲硝磺鉛子等項臣隨飛檄該總兵等飭令將弁加緊防守縣城綏集民人各歸安業又聞下淡水之新園水底藁三角湖姑婆寮九脚桶等處賊匪猖獗連日出沒攻戰不息臣隨飛咨郝壯猷速即派撥官兵併令遊擊鄭嵩赴新園剿匪該處道路一通則署都司邵振綱即可帶兵馳出合攻水底藁三角湖

等處臣察看各處賊勢雖被官軍疊次剿戮而餘匪東徙西奔四處皆有賊踪竄匿更訪聞中路之大武隴一帶山路綿亘現有賊夥適聚日內亦即遣官兵馳往剿捕務必除盡根株不遺餘孽再總兵柴大紀咨報訪聞林爽文等在大里杙南投沙連斗六一帶糾匪衆多併有賊夥在諸羅附近之打猫大埔林等庄滋擾須添兵前赴各庄勦匪臣隨飛檄副將徐鼎士將帶到兵丁一千五百名除酌

留五百名在上淡水防守外其餘一千名該副將帶
領晝夜兼程赴諸羅與柴大紀會兵北剿二月二十一
日柴大紀咨報十二月日訪查大坪頂有賊匪復聚夥黨
隨帶領官兵前赴圍拏施放鎗砲打死賊匪三百餘人殺
死者亦多擒獲賊匪蔡慶等七名併奪獲刀械牌旗等
項又陸路提臣任承恩扎稱總兵普吉保帶領官兵已齊
到鹿港一面分駐各要隘一面會籌進剿各賊巢等
因臣緣南路鳳山甫經克復官兵尚未撤回現在存郡

兵少府城緊要未可遽離致有意外疎虞俟南路
檄兵回郡之日即馳赴北路一帶與任承恩會辦
業先密札任承恩速應擒渠搗穴但該處附近生
番勢必竄入內山應令理番同知令通事土目傳
諭內山生番及沿界熟番一體堵截擒獻示以重
賞仍於四路出沒要口分佈官兵嚴緊偵擒如日
內禁大紀剿捕附近諸羅餘匪淨盡更可與普吉
保會同該提臣圍擒逆首併殲除匪夥毋致兔脫

奏入

上命軍機大臣傳諭常青李侍堯曰黃仕簡奏報剿洗南路賊匪尅復鳳山縣城一摺其所陳功案俱係罪案且一味飾詞推托即如該提督摺內既稱南路之崗山崙仔頂等各處俱係賊藪勢甚猖獗亟應一舉撲滅何不親率弁兵前往剿捕乃惟添遣官兵飛檄該鎮將等進攻似此東堵西禦疲于來往適足為賊所輕么膺草竊自然毫無顧忌日聚日多至遊擊鄭

嵩等分路進攻鳳山收復城池時伊仍安然坐守又不親往是誠何心又摺內稱官兵疊次剿賊餘匪東徙西奔四處皆有賊踪等語黃仕簡並不能親赴賊巢將首逆擒獲致賊夥蔓延團結乃尚稱除盡根株不留餘孽伊試自思數月之久所辦何事賊勢尚如此鴟張惟與任承恩互相推委非伊二人貽悞而何尚覲顏為此語乎且大兵雲集各縣俱已次第收復豈臺灣郡城轉慮其有意外疎虞之理乃黃仕簡仍

稱守城明係藉詞掩飾以文其遷延觀望之罪著將黃仕簡原摺發交常青閱看向黃仕簡逐一嚴審詰訊至黃仕簡任承恩始終貽誤緊要軍機其咎甚重必須拏問常青到臺灣後遵照前旨先將伊二人摘去花翎任承恩令其由北路回至內地廈門勿令伊二人同在一處致有彼此關照通同捏飾之事並著李侍堯于任承恩到後即行委員解京黃仕簡留廈門候旨常青李侍堯此時且當慎重不可稍露端倪

另候諭旨辦理想亦不久待常青奏到即有旨諭矣
至常青現在自己抵臺灣應照節次所降諭旨悉心
籌畫統率各路官兵親赴賊巢一鼓剿滅以期迅奏
霄功

臣等謹按黃仕簡以收復鳳山空城鋪張調度攘
為已功而於各處賊藪惟遣兵進攻又自藉口保
固郡城以掩其畏葸不前之咎

皇上以陳功之案俱係罪案

嚴旨詰責令其詳悉登荅竟無可置喙而猶以老病貸其一死

聖天子法外施仁何所不至歟

十五日

癸未

孫仕毅奏言續獲天地會匪犯林功裕

供出之朱洪德洪李桃等與閩省從前究出之洪二和尚及朱姓形迹相同或即係洪朱二犯亦未可定奏入

上命軍機大臣傳諭李侍堯孫仕毅徐嗣曾曰此等倡

會結盟煽惑人心首犯不可不嚴緝務獲跟究黨羽
以盡根株現據所供姓名住址俱在閩省且有記號
歌訣轉相糾約搶奪財物是該犯等在閩省結會滋
事竟係明日張胆毫無忌憚其黨羽必多無難跟踪
緝獲徹底究辦李侍堯現駐劄江籌辦軍糧一切
及善後事宜自不能分身前往徐嗣曾在漳泉一帶
海口督查尚無緊要事件著該撫即親赴各該處將
朱洪德洪李桃二犯嚴緝務獲訊明夥黨一面按名

查拏一面即派委幹員將二犯迅速解京歸案審辦
該撫務須不動聲色嚴密妥速辦理毋任奸徒漏網

十六日

甲中

郝壯猷奏言初九十二等日帶兵前往

各庄剿捕俱遇賊匪數千人隨督率官兵向前追
殺鎗砲打死賊匪數百人十三日賊匪復來攻營

臣自未刻對敵連宵達旦至十四日午刻賊始敗
走官兵奮勇追殺鎗砲打死賊匪數百餘人十五
日派撥官兵分路直搗崙仔頂賊寨將草蓆數百

間盡行燒燬十七日由阿公店一路剿捕二十日行至橋仔頭又遇賊匪千餘人前來堵截隨督率弁兵施放鎗砲打死賊匪甚多二十一日由橋仔頭進攻至午刻直底鳳山鎗砲齊發適水師提臣

黃仕簡另派遊擊鄭嵩帶兵由海道前來夾攻賊匪不能抵敵由北門奔逃追獲盔砲硝磺鉛子等項隨派遊擊蔡攀龍入城安民加緊防守併令臺灣府經歷羅倫進城總理一切臣即就城外劄營督

率官兵嚴加搜獲賊夥跟緝賊首併令弁兵不許
擾害良民所有官兵奮勇衝鋒殺賊內有陣亡受
傷者查明員名造冊呈送督提二臣辦理奏入報

聞

欽定平定臺灣紀畧卷十

欽定四庫全書

欽定平定臺灣紀畧卷十一

三月二十一日

丑巳

李侍堯奏言接副將丁朝雄等

具報郝壯猷收復鳳山之信竊意南路自此廓清
可用全力向北路會剿巢穴及接黃仕簡抄錄摺
稿稱尚需駐兵搜捕未敢遽離府城是黃仕簡既
坐守郡治而郝壯猷亦不能撤兵往北路會剿可
知至北路之兵雖據黃仕簡奏任承恩普吉保柴

大紀及徐鼎士所帶共有七千餘名查紫大紀收復諸羅後以四旁尚多賊匪仍駐諸羅近又請兵協助而徐鼎士在淡水北又以艋舺等處民人懇求留駐尚在稟商兩提臣檄示任承恩普吉保在鹿仔港雖據報屢有堵殺而以賊尚鴟張不敢輕進又咨商黃仕簡撥兵會攻是該提鎮等各有牽掣不免坐費時日殊無可恃惟望常青到彼大加振作方可制勝常青臨去時其氣甚壯到臺灣後

如遂能大勝一二次使賊黨潰散即可不必增兵
如實係賊多兵少則與其曠日持久收功緩而費
轉多不如量為增調以期迅速歲事但閩兵除先
後派調外各營存留較少且兵律久弛增調亦不
得用即如臺灣額設戍兵本有一萬餘名當林爽
文猝起時僅柴大紀帶一千數百名在鹽埕橋堵
守而保護府城尚係兵民兼用臣于二月十九日
即咨詢黃仕簡柴大紀等令其查明缺額以便撥

補又屢次札催至今尚未覆到是舊有之戍兵已屬有名無實現在所用祇內地調往之一萬一千餘名而兩月以來情形又如此將怯卒惰已可概見是閩兵竟不必更調臣前在兩廣時知潮州碣石二鎮兵尚屬可用且地近泉厦調遣亦便臣于接印後恐將來有需接濟之處曾密札孫士毅預脩兵數千以待緩急昨接孫士毅札已密選四千并稱南澳鎮陸廷柱情愿帶領前往可即派為總

統大員其餘將弁亦已預行選派等語臣現飛札
常青察看如果必須增兵一面具奏一面即飛咨
孫士毅調遣起程可不至稽緩再常青于二月三
十日申刻已經放洋嗣因風帆不順屢出屢回據
廈防同知劉嘉訓本月初五日具報尚在料羅暫
泊臣心不勝焦急惟有敬詣

天后宮行禮祈求順風俾得速渡再廈門同知劉嘉
會解到桐山營逃兵汪中鯉王正榮二名緣上年

十二月初七日隨同守備董得魁在中港抵禦被賊衝散私自逃回赴水師叅將衙門捏報董得魁差令往臺灣鎮求救因陸路被賊阻隔由大雞籠搭船遭風飄至桐山隨經飭查實係逃回即將該二犯正法至許阿協所供邀入會者係賴阿邊賴阿立二人賴阿恩林阿俊所供邀入會者係梁阿步一人而賴阿恩之子賴娘如林阿俊之子林阿真俱在梁阿步戲班內唱戲孫士毅行知閩省緝

獲臣到泉州該府縣已將各該犯拏獲先後解到
臣以此案人犯未經查拏自當緩辦既經獲解又
不便遲留隨委司道府等嚴訊據各犯堅供不過
素相認識並無糾約入會情事臣以事關重案該
犯等或因許阿協等俱在粵省無憑質對是以串
供狡賴委員將賴阿邊賴阿立梁阿步賴娘如林
阿真五犯解赴粵省孫士毅現駐潮州自可就近
審理一經質訊即當水落石出以成信讞本日又

准孫士毅咨稱續拏林功裕一犯又供出賴阿德
洪李桃張阿和李九陶林三長朱洪德張攀桂六
名俱係閩省天地會內人犯是閩省為此教之淵
藪無疑惟是漳泉一帶民情輕慄去冬已多訛言
近日漸覺寧貼則正可以相安于無事若四處查
拏恐又增一番惶惑或別滋事端臣謹將孫士毅
所咨人犯面諭地方官密為存記統俟臺灣剿匪
事竣後辦理并知會孫士毅將粵省獲犯暫行監

禁緩辦奏入

上命軍機大臣傳諭常青李侍堯孫士毅曰李侍堯亦看出黃仕簡任承恩二人貽誤情形但所奏未免略遲現在惟望常青到彼大加振作方可制勝如該督到彼即將賊匪一鼓殲擒自屬甚善如賊匪負隅抗守剿捕稍需時日自應量為增調兵丁以期迅速蒞事但閩省之兵存營者已少且該省兵律久弛現在派往臺灣者零星打仗又復氣餒更恐不能得力不

如就近于粵省挑選預備李侍堯籌慮及此已咨孫士毅密為調備尚為周到惟粵省所備之兵既有四千名恐陸廷柱一人不能照料高廉鎮梁朝桂曾在軍營打仗於軍務自為熟悉著孫士毅即密劄該鎮速赴閩粵交界處所駐劄聽候調遣至臺灣額設兵共有一萬餘名林爽文滋事時作何調撥堵禦何以柴大紀在鹽埕橋拒守亦止帶兵一千數百名此外兵丁又在何處柴大紀此次保護郡城雖為出力近

日以來漸覺觀望不前常青到臺灣後一併查明據實具奏又據李侍堯奏漳泉一帶民情輕慄近日漸覺寧貼所有粵省咨拏天地會各犯現案為存記俟事竣後辦理等語所辦甚是著孫士毅即照李侍堯所奏將現獲各犯暫行監禁俟事竣後再為辦理上又諭內閣曰臺灣逆匪林爽文等糾眾滋事水陸兩提督帶兵分路進剿並不親臨行陣定期會攻致賊匪日久未就撲滅節經降旨嚴飭並諭令常青據實

嚴審查叅茲據李侍堯奏到軍務情形摺內稱南北
兩路該提鎮等各有牽掣不免坐費時日等語果不
出朕所料黃仕簡承恩最久向來辦事尚屬黽勉乃
於剿捕逆匪一事漫無籌畫因循玩悞本即應拏問
治罪姑念其年老且係病後着常青將黃仕簡即遵
前旨送回廈門內地候旨水師提督着郝壯猷暫署
至任承恩經朕屢加拔擢用至提督且係自請前赴
臺灣剿賊伊年力正強理應加倍奮勉乃亦逡巡畏

慈與黃仕簡互相諉卸實屬辜負朕恩即著傳旨革職拏問交刑部治罪其陸路提督員缺前因柴大紀保守郡城尚為出力本欲將伊擢用但柴大紀于林爽文等滋事之先不能預為防範且臺灣原設兵額一萬餘名該鎮督率守城之兵不過一千餘名此外兵丁現作何用並未據柴大紀奏及實有應得之咎所有福建陸路提督員缺即著藍元枚調補

二十二日

庚寅

上命軍機大臣傳諭常青李侍堯曰昨經降旨將任承恩革職拏問黃仕簡撤回廈門其水師提督員缺即令藍元枚調補所有陸路提督員缺除柴大紀另看其如何奮勉將功抵罪其餘總兵郝壯猷普吉保二人現在臺灣帶兵打仗尚屬弼勉常泰雖未帶兵前往勦賊然在漳州一帶彈壓地方亦為鎮靜有方該鎮係朕簡調之人著傳諭常青李侍堯于郝壯猷普吉保常泰三人內察看孰為出力並才具堪勝提督

者保舉一人一面將陸路提督印務令其署理一面會同提實具奏候朕簡放

二十三日

辛卯

李侍堯奏言柴大紀在諸羅咨請兩

提臣撥兵協助任承恩在鹿仔港又檄徐鼎士帶兵會攻徐鼎士復以艍艍民人懇求留駐尚在未行各情形是任承恩柴大紀等非惟不能合剿大里杙并諸羅彰化間道路亦未疏通又羅禮璋巡查至扈尾庄被賊數千圍住徐鼎士聞知遣兵併

力抵禦賊始退去是徐鼎士亦未能即往任承恩處會合看來各提鎮等彼此相待坐廢時日固不待言而處處被賊牽掣官兵不敷調用加以相持日久賊黨益多兵氣漸餒亦屬實情而黃仕簡於二月二十七日續調澎湖兵二百赴臺灣則南路又似有需添兵之處常青至府城即欲向北路會勘看來已無兵可帶亦必不能不請增兵該處遠隔重洋風帆不常動需時日若俟常青咨會到臣

始行調集往返又輒月餘臣既確見實在情形不敢稍有遲緩致悞事機昨據孫士毅札稱已選兵四千并將弁等亦密行揀派而總兵陸廷柱曾任臺灣情願帶兵前往臣一面知會常青一面飛咨孫士毅迅將預派之將弁兵丁剋日起程一由廈門赴鹿耳門一由蚶江赴鹿仔港由廈門者令陸廷柱帶往查南路郝壯猷尚在鳳山常青無大員同行陸廷柱到時正可資臂指之助由蚶江者令

將備帶往聽任承恩普吉保等驅策似於兩路俱
有裨益而兵事可以迅速奏功再常青楊廷樺俱
于初六日戌刻在料羅放洋又南澳鎮係閩粵兩
省兼轄向例委署總兵閩粵兩省督臣輪流派委
此次陸廷柱帶兵前往臺灣所有總兵員缺輪屆
閩省委署閩省將領出征者多無員可委臣一併
咨明孫士毅聽其酌量委員署理奏入

上命軍機大臣傳諭常青李侍堯孫士毅曰臺灣初起

事時朕即不願任承恩前往者恐二人不相統屬未免有推諉觀望之事因將李侍堯調補閩浙總督並令常青前往臺灣督辦以防緩不濟急幸而事事預為布置否則該處止有常青一人既不能分身前往而黃仕簡任承恩今竟如此因循貽悞賊匪日久蔓延設乘間別生枝節致蹈從前朱一貴滋擾故轍或竟如木果木之失事尚復成何事體耶今李侍堯果看出該提鎮彼此觀望坐廢時日賊黨益多兵氣漸

餒不俟常青知會即飛咨粵省令預派之將弁兵丁
尅日起程籌辦甚為周到動合機宜頗慰朕懷惟粵
省預備之兵既有四千名恐陸廷柱一人不能照料
昨已有旨令梁朝桂赴閩粵交界處所聽候調遣著
孫士毅即飛劄梁朝桂速行前往帶兵赴鹿仔港勉
力會剿從前賊匪初起時孫士毅調發弁兵前往策
應朕以本省兵力已厚是以降旨諭令撤回今復須
徵調雖似多一番往返之勞然竟實受撤回之益設

使彼時粵兵早抵臺灣不過分屬任承恩黃仕簡二人帶領仍派令零星打仗該兵丁見閩兵不能得利自必日漸氣餒徒使有用之兵亦歸無用此番新調之兵初抵臺灣聽常青帶領其銳氣方盛正可資其生力轉於軍務有裨至黃仕簡任承恩玩悞緊要軍務之罪均應按律正法但念黃仕簡年老又係病後且伊從前辦事尚屬黽勉姑貸其一死令其退廢家居自思咎戾所有公爵仍加恩令伊長孫承襲至任

承恩之父任舉前在金川陣亡任承恩又現無子息朕軫念前勞不忍令捐軀殉忠者絕嗣任承恩俟刑部照例定擬具奏時尚可加恩貸其一死但老師糜餉之罪伊二人百身難贖若使幸免餘生之人坐享豐厚不足以示廢弛軍旅之戒將來事竣後所有多延時日糜費之軍需銀兩均應於黃仕簡任承恩名下追賠以示懲儆至常青于初六日放洋現在早抵臺灣務照節次所降諭旨悉心籌畫妥速督辦

二十四日 壬辰

上命軍機大臣傳諭常青李侍堯曰徐鼎士于上年十月
二月即經常青徐嗣曾派令帶兵一千五百名赴臺
灣進剿乃該副將所帶之兵屢稱因風阻滯直至二
月初旬始據稟報陸續前赴淡水已不免遲延及到
鹿仔港總未報其剿殺一賊現經任承恩檄令帶兵
會攻復以艋舺民人懇求留駐並未前往會剿看來
竟係有心逗留畏懦不前藉詞支飾不可不嚴行查

辦行軍之道全貴紀律嚴明信賞必罰若將弁臨陣
出征心懷怯懦惟恐遇賊接仗而畏葸退避者即可
幸免無事使人人效尤則將弁兵丁又孰肯奮勇直
前致命效死耶著常青即嚴查該副將前赴臺灣曾
否稽遲及現在任承恩檄調何以不行前往若徐鼎
士果有畏縮逗留託詞規避之處即應立行拿問據
實叅奏當按軍法從重辦理俾在事兵弁咸知敬畏
並著李侍堯一體嚴切訪查據實叅奏至柴大紀自

派往諸羅以後于勦捕一切不能如從前之出力並著常青一併查奏

二十六日

甲午

上命軍機大臣傳諭常青李侍堯曰黃仕簡任承恩於本月十二十四等日奏到之後迄今將屆半月何以並未將勦捕情形隨時奏報况朕因黃仕簡畏縮不前是以特派常青前往督辦伊二人一聞此信苟稍有入心即當自知愧懼趁常青未到之前親帶弁兵

迅速進剿以冀將功抵罪乃竟閱多日並未將如何
剿捕情形具摺馳奏可見伊二人竟係自甘頹惰觀
望玩延其貽誤之罪更無可追著該督即將黃仕簡
任承恩於前次拜發奏摺後此十餘日內在彼辦理
何事何以並無一字奏及之處據實查明叅奏

二十七日乙未李侍堯奏言接到海防同知楊廷理
稟報較臣所訪更為詳悉所云現在兵數合之則
多分之則少尤覺切中竅要并稱臺郡與鳳山連

界之水底蔡等處尚有莊大田等賊出沒焚掠則南路之兵似不能盡撤致府城有單薄之虞查臺灣合各路現有之兵僅一萬三千有餘看來常青欲往北路會剿祇能于府城及南路兵內抽調一千餘名到諸羅後再增柴大紀之兵千餘名力量尚覺未厚臣奏調粵兵內檄令以二千五百名由鹿耳門進口常青得此庶覺軍勢壯盛至任承恩處旬日以來久不得信茲據該同知另稟有鹿仔港

船戶來郡詢知二月十三賊匪來攻大營任承恩
普吉保等大加勦殺賊匪死傷無算等語又有解
餉之經歷鄒貽詩稟亦相同但未見任承恩等奏
報過境想因風水不順阻擱在途臣謹抄錄原稟
及所繪圖一併進呈奏入

上命軍機大臣傳諭常青李侍堯曰本日李侍堯奏到
臺灣情形一摺並抄錄海防同知楊廷理原稟據稱
賊匪滋事以來大兵僅屬固守皆以兵單難於遠捕

為辭如彰化早經恢復而任承恩駐兵鹿仔港普吉
保駐兵埔心庄諸羅收復月餘而柴大紀駐兵城外
鳳山甫經收復郝壯猷分駐四門靜守黃仕簡駐守
郡城以致賊匪各路嘯聚現在臺灣之兵統計一萬
三千有餘合之則多分之則寡等語該同知所稟各
情形早在朕遙度之中可見兵力以分而見單伊等
貽誤實由於此昨經降旨將任承恩革職拿問尚以
黃仕簡年老有病僅令革職撤回內地今伊等如此

玩悞則二人厥罪維均黃仕簡亦難稍為寬宥著李
侍堯一俟黃仕簡回廈門即傳旨一併革職拿交刑
部治罪至該提督等株守玩延致令將弁等效尤觀
望不能早擒賊首俾賊匪得轉相嘯聚逼脅平民其
中不肖之徒勢必與賊烏合日積日衆滋擾蔓延昨
經李侍堯奏添調粵兵四千名一由廈門赴鹿耳門
一由蚶江赴鹿仔港等語看此情形常青處所有之
兵尚未免單薄著傳諭李侍堯如粵兵尚未分路配

渡即檄令全赴鹿耳門直抵臺灣府城俾常青處兵力壯盛足資調遣如業經分路配渡前進著常青於粵兵將抵鹿仔港者亦即調來合為一處常青親帶勇往將弁徑赴大里杙賊巢鼓勵弁兵務將首惡林奕文一鼓擒獲其餘賊衆不難撲滅淨盡又聞該同知原稟內現在府城諸羅彰化之間各處皆有賊人屯集常青經過地方中途遇有賊匪抗拒正可痛加殲戮俾賊匪聞風膽落路途無阻直指賊巢此事惟

仗常青遵照節次指示悉心籌辦紆朕南顧不致復蹈黃仕簡任承恩故轍也其柴大紀郝壯猷普吉保因二提臣觀望不無效尤今二提臣已拿問其柴大紀三人效尤之罪且赦不問令其効力帶兵贖罪如伊等亦有畏蒞觀望情事或不可令其効力即著常青據實叅奏毋得稍有徇隱

同日孫士毅奏言赴惠潮一帶海口督拏竄犯搜捕會匪途次接准閩浙督臣李侍堯密札臺灣賊

匪尚多南北兩路未能會剿常青到彼或須酌量
增兵以期一舉蕺事向知潮州碣石二鎮兵尚可
用囑臣慎密預脩查來咨雖稱此次兵丁果否徵
調尚在未定但既有酌量增兵之語自應迅速預
脩以便剋期就道臣一面密飭潮州碣石水陸二
標及附近各營共挑足四千之數迅即派定分起
來潮茲臣於三月初七日抵潮提臣高瑑亦巡查
到此一切預脩事宜現在會商妥辦再閩省尚須

集兵搜捕似內地查拏會匪一事尚宜慎密臣與閩省現已彼此關會存記俟一舉蕩平再行從嚴辦理又南澳鎮總兵陸廷柱統領官兵赴臺遺缺請以澄海協副將鄭元好護理其澄海協員缺請以廣海寨遊擊張天宿護理又香山協謝廷選羅定協貴林肇慶協官福現亦領兵請以左翼鎮遊擊黃錫侯護理香山協印務督標前營叅將新泰署理羅定協印務督標水師營叅將劉天爵兼署

肇慶協印務至查察惠潮一帶沿海口岍汎地尚屬整肅臣俱面論該管文武密為偵伺果有踪跡可疑者方許立時盤詰解究不得一味驚擾以致商民裹足據饒平縣續獲會匪陳阿塔余阿緒二名余阿緒供係徐阿番勾引入會其所傳暗號歌訣均與前獲之許阿協等大略相同其供出夥黨俱密為存記至前此許阿協等供出閩省勾引入會之梁阿步賴阿邊等經李侍堯因該犯等堅不

承認解粵質審臣俟該犯等解到彼此畫一密辦
奏入報

聞

二十八日丙申孫士毅奏言此次密派官兵俱已酌

定起數預為妥脩今定于三月十六日即令頭起
官兵自潮起程每起二百五十名間一日行走自
粵省黃岡入閩省詔安境相去止數十里自詔安
至廈門蚶江等處亦止數日可到照依李侍堯派

定數目以二千五百名赴廈門一千五百名赴蚶
江配船渡海臣與提臣高瑳往來彈壓稽查沿途
派令惠潮道圖畢赫潮州府孫泳惠州府顧聲雷
督率經過之各州縣妥協照料催趲前進並多備
火藥及裹帶一月口糧俾資接濟其弁兵應得分
例量為借給俟將來閩省定有章程再行畫一辦
理奏入

上命軍機大臣傳諭常青李侍堯孫士毅曰據孫士毅

奏是該省官兵全數在潮起程已在四月中旬加以配渡放洋計四千名陸續全抵臺灣極早亦須至四月下浣常青于三月初六啟旋放洋不過初十內外業抵臺灣若必俟粵兵到日始行進剿則歲事之期竟須至五月豈不曠日持久著傳諭常青體察情形若臺灣現有之兵一經鼓勵覺屬可恃即擇其精壯者親身帶至大里杙賊巢痛加殲戮將首逆林爽文擒獲其餘附從自紛紛瓦解固屬甚善如該處之兵

實不可恃必須接濟或俟粵省數起官兵到後酌量足數勦捕即帶同前往俾新舊間用庶新到者勇氣方張舊存者心有可恃亦自必旌旆改觀不可拘泥必待粵兵到齊始行辦理致再遲延或臺灣現有之兵其氣已餒必須全仗粵兵到齊方能前往勦捕之處常青亦不可因有此旨稍存輕率之見務在相機妥辦動出萬全以副委任至粵省未經起程官兵着孫士毅即另行籌酌令其併起行走並先知會李侍

堯預脩渡船其已入閩境官兵著李侍堯飛飭沿途
催趲前進李侍堯即當親至廈門料理隨到隨渡至
此事總由黃仕簡任承恩二人互相觀望以致久稽
歲事其罪實無可逭孫士毅駐劄潮州相距不遠其
於黃仕簡任承恩玩悞之處自必有風聞著該督即
將所聞據實覆奏勿稍迴護

欽定平定臺灣紀畧卷十一